

卷三十八

藝文書錄 史部

卷三十九

藝文書錄 子部

臨海縣志稿

第二十冊

臨海縣志稿卷之三十八

藝文

史部

丹邱仙迹

宋不著撰人名氏

尤袤遂初堂書目

台州風俗記

宋陳公輔撰

赤城集

桂海志續

明王士性撰

廣西通志引汪森粵西文載士性自序曰昔宋范成大帥粵愛其土之山川及移蜀猶不忘憶而作桂海

虞衡志稱其勝甲於天下余以萬歷戊子典蜀試攬勝紀遊樂焉忘返已自蜀改粵時猶恍惚行巫山錦水中也亦爲刻入蜀三記

於郡齋是何與范先生易地而同思耶其後范鎮蜀未知誌蜀山
川否余乃爲粵遊志首獨秀山次疊綵次寶積次七星巖次省春
次灘山次隱山次龍隱次伏波次白
龍次虞山又次堯山而終以訾家洲

廣志釋五卷

明王士性撰

台州外書五岳游草紀山水勝境此書則兼志山川形勝要害河海運道及五方人情土物尤爲有益經

世之學非但緒餘足供多識而已乃恆叔晚年之作其稿先流落
四明楊持莊得之屬署奉化令楊體元付梓因兵燹失去繼重得
錄本於李氏以游草內雜志二篇有志釋所未

備者并附梓之體元自序其刻書顛末如此

楊體元自序曰昔人謂性好讀書清福已具歐陽子亦曰物必聚

於所好故好書者往往得遇奇書微獨福也蓋前人著之而或傳

或不傳者後人得而讀之而且傳之自有性情感召不偶然矣四

明楊持莊先生博雅醇粹藏書萬卷一日示予一書爲廣志釋

若干卷曰此赤城王恆叔先生所著未傳之書也先生高才

平生好遊有五岳游草有廣遊志皆宦轍所至耳目所睹記其

已傳世多有之後居南鴻臚追繹舊聞復爲廣志釋書成郵

赤水先生序未竟而先生捐館矣此書遂流落四明楊持莊

得之藏且有年甲申秋予攝篆奉川屬以付梓時南北用兵天下
雲擾僅錄二冊一自藏一付王氏諸係丙戌兵變竄徙草間錄本
失去每深惋惜忽忽不自得雖所畜金石琴硯書畫鼎彝愛玩珍
重者一時散亡都不復念獨念此書不置也甲午遊四明遇同學
李懷五家藏是書予輒喜過望如見故人請假錄之無論出處必
攜反覆校閱即寒暑晦明寢食憂喜無間也若與恆叔先生同時
商確焉徧質之博雅君子如曹秋岳夫子沈大匡先生沈次柔顧
甯人項東井諸同學咸謂是書該而核簡而暢奇而有本逸而不
誣其志險易要害漕河海運天官地理五方風俗九微情形以及
草木鳥獸藥餌方物飲食制度早晚燥濕高卑遠近各因時地異
宜悉如指掌使經綸天下者得其大利大害是諸碩畫可以佐太
平卽其緒綸亦足供王謝鹿主有裨風雅不似齊諸碩志怪虞初小
說百家雜俎誕而不經玉卮無當也念是書當兵火之餘得而失
失而復得相去凡三十年於茲而今日得壽諸剞劂以傳不可謂
非性情感召不偶然也夫誦詩讀書古人謂之尙友或亦予與恆
叔先生有夙契哉乙卯冬偶過天台訪廣遊志不可得得五岳遊
草而卒業焉內雜志一卷有志繹所未備者附梓於後
以傳先生未傳之書併以副持莊先生付託之意云

臨海仙巖文信公新祠錄二卷

明葉琰編次王梅林校輯

范氏天一閣書目

蔡雲程序曰仙巖

泰和胡侯濟世圖祀宋丞相文信公暨從行杜潯張和孫胡文可
呂武四義士於是輯錄以示有永云錄上下二帖首紀文公航海
艱危之迹義士有傳公牒有稽祀田有記儀品有式并諸縉紳詞
篇俱載焉一展卷而大節孤忠昭然在目矣胡侯爲懇一言以
置首簡不覺喟然爲歎曰成仁取義孰無此心義盡仁至尤共悵
服如湘沅錦水睢陽峴谷爲古忠良垂勳効節之區至今過者莫
不爲之振衣肅容究其崇祀報功之始又莫不有曠世相感之士
爲之營度開創殆非偶然者夫宋祚延至德祐中國胥爲夷壤槩
知付之歆歔太息耳死國事者惟張陸數公可以指屈乃文信公
當流離萬死之餘直欲以子軀斡旋宗社翦滌腥羶此何心也而
杜張胡呂輩相從於風濤戎馬之中舍命不渝又何壯也嘗攷吾
台志籍所錄長老所傳並葦漪堂諸作膾炙人口孰不曉然知文
公求謁二王所從歷之蹟乃溫郡江心廟食如在而台猶爲缺典
鄉先達謝文肅黃文毅諸公嘗欲建祠委羽比吾諸同志亦擬祠
幘麓並因循未果迨今胡侯采庠生王子梅齡輩之言毅然以身
任之爲之斥俸金新廟貌置祀田而督學秦公梁兵憲趙公大河
僉輒建之郡守李公光震毛公木又後先贊之仗義葉貢士琰同
庠生鳳元輸地繪像暨張氏仲敷氏應魁者捐貲製器碑頌成諸

縉紳復競爲之執筆於此見好德之在人心今古如一曷容或已也且仙洞爲忠貞所駐宜於安神矧文公爲胡侯同土義士文可者又實爲侯先世曠典成於一朝豈事機之會源流之懿必有待而後集耶抑亦彝氣將淨天假忠義威靈以障海宇於無盡耶余嘗撫歷江右特葺公祠於吉郡蓋公肇生之地也又嘗虔謁公祠於燕市蓋公全節之所也今復覩建斯祠於吾鄉其爲仰止之心更何可言噲耶嗟夫三百年綱常之重公以一身任之諸義士共濟其間則今茲斯祠之建斯錄之紀厥功亦靡輕矣因序之以致邑宰萬君言策亟爲付梓焉若胡侯之洎吾台廉操惠政聲實胥茂茲尙未遑贅述也嘉靖乙丑蜡月旣望

仙巖大忠祠錄六卷

清馮賡雪重輯

齊召南序曰濱海有山數百仞岩石瓊瓏呀然成洞徑竇紆迴往復所見崖壁波立雲垂瑰偉不可

名狀仙岩洞也洞有宋文信公祠配以杜濬張和孫胡文可呂武四義士卽德祐中公航海過此宿和孫家與三人南浮甌閩舊蹟公集有詩二篇後人建祠崇祀序記題詠甚衆懼祀典掌故久漸無徵此道士方一定有大忠祠錄之刻嗚呼岩洞奇秀夙以仙名意古時必有仙人鍊丹飛昇其地而圖志闕如姓字莫考信公不過因艱虞顛沛偶爾信宿仙巖之名遂轟然於高天厚地與祁山

五丈原並耀青史有耳目者莫不見聞然則乾坤正氣雖死不死
萬古爲昭不又勝於餌藥延年以求長生者之壽不可量乎哉題
詠篇什工拙不同大抵本性情感忠義有關倫常要未有流連景
物徒侈言夫游觀者也嗚呼吾台當宋之南始於高宗金鰲維舟
而偏安定終於丞相仙巖一泊而大義明高宗智勇遠不及漢昭
烈炯如也忠若信公取義成仁百折而志不少挫蹈萬死以如飴
其卽武侯之後一人乎山在臨海東北百二十里予雖未遊爲集
杜句寄題祠壁因道士請書數語簡端督學浙江吏部右侍郎
彭啓豐序曰章安諸生馮慶雪等郵寄大忠祠錄屬予爲序按章
安郡東百餘里有洞曰仙巖雲垂壁立洞石玲瓏建宋丞相文信
國公祠於此公使北時爲伯顏所拘至京口台人杜沂從公行脫
公走揚州從通州泛海至台宿義士張和孫家後和孫與沂俱殉
國又有都巡胡文可環衛呂武集兵赴難明嘉靖時里人祀公於
仙巖洞配以杜張胡呂云嗟乎建炎以後大命漸傾君無昭烈帝
之才而臣有孔明之忠金鰲之泊厓山之殉惟成仁取義足以感
發人心故冒鋒鏑赴溟渤而不辭予嘗至溫州江心嘗謁信國公
祠讀壁間正氣歌風聲蕭騷起樟樹爲之欷歔不置台人之祀公
慕義弗衰良有以夫方其取道避敵不過如郵亭過客而神歸台
岳氣塞滄瀛風雨靈旗彷彿見之何必探仙人鍊丹之迹而後爲
歷劫不壞之區也耶爰爲文以紀浙江督學使者雷鉉序曰臨

海之仙巖洞有宋文信國公祠蓋公脫險海行將達溫遇敵舟避
仙巖港登陸曾寄足焉後之人建祠以祀爰錄其事之始末且紀
當時杜張胡呂之實跡附以題咏諸什合二冊道士方一定恐其
散失無稽將鏤板丐廣文以序請夫公當顛沛流離一身歷之地
迄今人不能忘此精忠大節足以感發人心也顧以一道士守公
祠字尙拳拳如此况爲朝廷之命官奉聖賢之俎豆可不思振奮
而躋乃職乎且公能使張胡呂冒鋒鏑蹈白刃以相從學使者
擁節持衡以軒輊多士不能鼓動之使澡身浴德於雍容暇豫之
日其爲疚也不多矣乎此予與諸廣文所當惕然內省者也至於
祠因公而不可朽巖洞亦藉以傳焉不待贅爰卽時序之并爲多士
最云郡守張逢堯序曰章安郡城東去百里許有仙巖洞中乃
宋丞相文信國公祠蓋臨安末造公負義航海止宿於此後人構
數楹以祀公者也今年春余奉命守茲土下車伊始義諸子及題
猶未過公祠而拜焉適邦人士彙公過台始末并從義諸子及題
咏諸篇哀而成集黃冠方一定將壽之棗梨特來請序於余余憶
初釋褐遊京師客有談浙東西遺事者謂余曰浙人慕義勿可及
也予心領之未幾以選人之籍至西泠宋故都有少保岳公
之墓在買小舟過謁湖山社火風雨靈旗瞻拜者比肩疊跡而至
余爲感動不能去明年之古虞任因渡江問冬青穴焉寒瑤拾自
遺民麥飯供自田父訪其故事聞與見符前言不余欺也至若台

人之於公取道避敵視猶過客耳託足如彼其暫愛戴如此其誠
則此邦人之慕義更何如耶嗚呼英雄不論成敗道義可塞天地
浩然之氣何處不存况公之過台也杜張胡呂諸人感激涕零荷
戈起義義氣歷千載如生今仙岩港上古洞懸岩又烏知公之英
靈不去來於此土惓惓於邦人也抑余聞郡中事正學方先生其
謹正學故台人忠亦與信國相埒則社而稷之尸而祝之固宜他
日過仙岩謁公像尙將兼造先生之祠而拜之夫闡忠貞修廢墜
余與六邑諸循宰所共有事者也茲一篇足以風矣郡守海澄
蘇光弼序曰粵稽婆留丐地南渡兆白馬之祥理學名儒後先接
踵而間氣所鍾至信國公稱殿最焉臨安末造扶植綱常者非公
而誰以視玉津園內半間堂中其賢不肖相去爲何如耶可見大
君子過化存神地之靈者必本人之傑霞城仙岩洞祠字巍然至
今俎豆不衰匪曰食報而名勝藉公以傳則山川亦幸矣此都人
士叙事顛末復羅諷詠諸章幾及寸腰之束方羽士更欲梓以行
世余鑒其誠而讀其書之足以垂不朽也則公之靈爽雖奕禩後
猶足使人感發而興起矣語云水深則魚聚樹高則風多賢者足
跡所經而人心卽深向往則先生之正氣自足挽末俗起頽風忝
守茲土者亦景仰之以爲圭臬弗替云江甯胡莘隆序曰臨邑
之有大忠祠也二百年於茲矣過祠者必攝衣肅謁或紀之以詩
詩雖不盡工然其是非不謬也黃冠方一定者錄公過台顛末暨

建祠年月姓氏祭器祠田並詩文都爲上下二卷顏曰仙岩洞大
忠祠錄將授諸梓以志不朽而求序於余信國事蹟備載正史炳
若日星不多贅吾獨喜台人之能慕義也夫公生廬陵則浙東非
其梓里也仙岩百花洞去城百二十里而遙且公以亡命過此又
非若宦遊之所也徒以大義所激而此邦之人破家以容之荷戈
以從之一宿之緣俎豆迄於今不替彼專權誤國如賈似道者非
不赫赫一時所竄之處土人或爲露布相驅逐曩過西冷求所謂
半間堂者旣已化爲冷烟蔓草矣而茲之祠歸然存鳴呼祥鸞威
鳳之不同於鷗鵲鵲固也然其所以見三代之直道而行何嘗
一日亡於天下乎夫事關勸懲之大凡而懼其廢也豈惟監斯祠
者之責抑亦守斯土者之任矣因爲訂其舛誤補其闕失序而歸
之使知縣上元王三鑑序曰臨海仙岩之祀文信公由來舊矣蓋
公使北時爲伯顏所拘至京口台人杜梅壑從公行脫公走真揚
從通州泛海至台宿義士張哲齋家後哲齋與梅壑俱以勤王死
於國至明嘉靖時里人葉文岩創議請祀公於仙岩洞配以杜張
胡呂復纂祠錄二卷鐫板傳世當時巨手如王元美徐文長之徒
皆有題吟見諸本集則此錄之大有所係於風教不可泯沒於後世
也燭如矣歲久祠圯此錄亦僅存殘本我國家愷澤覃敷恭逢聖
駕南巡詔兩浙凡忠賢遺蹟悉令表章於是台之人士景仰非輕
捐資樂助重建祠宇纂修志乘守祠道士方一定留心風教奔走

六寒暑而祠堂落成但祠錄一書尙未鐫板余奉命出宰斯邑見而喟然曰此錄所在即正氣所流布扶綱常植名教實吾儒事也安可獨委其任於方外之人余既勞於吏治無暇及此因詢諸首事擇一勳行能文之士亟以成之時馮生賡雪主黃岩文獻書院諸首事始以此錄囑其編輯六閱月而書已成馮生家居台之南鄉與仙岩稍近又藏有金龍鈔本故此錄多所增補余覽其圖像之精傳記之詳題詠之富以及所附忠逸諸傳略信公正氣於此益彰即台嶽精靈海嶠幽光亦於此盡洩矣余乃掩卷太息曰仙岩古蹟得此一編不獨爲人臣立標準兼可以厲士風淑民志雖萬世有道可也庶不負聖天子褒忠表微之至意乎夫事必有待而成安知非鬼神呵護以俟有心人一發其秘哉余樂馮生能任其勞又且先得我心也錄成因爲序

桃城識略一卷

清尤瑩撰

游天台記一卷

明王亮撰

浙江通志
經籍志

天台游攷

明王豪撰

稚玉集 王亮序曰道書稱玉京靈墟爲洞天福地宇

擲地金聲惟永嘉太守孫興公一賦爲絕唱云第文則佳矣而山
川之神奇仙釋之寓踪遺漏夥焉蓋孫令工於揮毫耳未聞道也
茲閱吾弟所著游攷則山源川委朗若臚列靈卉珍禽爛然可觀
信有發前賢所未備者乃亦以興公自命豈其再來身耶且窮探
邃討三教之精往往於篇章間露其端緒則又遂初公所無也爰
稽典籍台山遠在幽遐未列五嶽自吾家子晉跨鶴吹笙其間故
武夷公稱爲華真仙師焉山遂標奇絕以嶽名矣余游桃源洞時
見苔蘚中結成玉仙丹井四字與邑志合而右軍墨池華頂龜翁
羽化樅村太和往來赤城梅溪三生首座先大父石梁公有覽勝
諸篇先子文林公有蔭松手集余不佞再過山中盤桓旬日偶成
一記謂自可答山靈而吾弟游攷則又詳焉豈茲山於吾王氏特
有緣耶抑吾父子兄弟於山靈微有勳耶台山本神仙窟宅而先
子曾遇異人神悟委蛻余又耽玄嗜奇頗有所得吾弟亦屢屢乎
聞其概矣則萬人峯頭獨私之吾家非誣也爰命筆書之簡端

東湖志二卷

清洪震煊沈河斗郭協寅撰嘉慶九年郡守特通阿主修

特守序曰

余曩佐治杭州偶覽西湖志分五路列二十門部居州次條貫井然及奉命浚台公餘之暇抽閱前守張覺菴天台山志首名勝終藝文各自爲卷雖非志例而列代騷人墨客之作皆得依類編次蓋志山水與志郡邑不同山水非藝文不傳康樂無詩雁宕以晦賀監乞歸鑑湖遂顯是也台郡東偏貢城爲湖自宋熙甯年始其宣洩防捍之利於民者具詳前人碑記而亭榭花木之觀繚碧紆青時見諸名流題詠余始至案牘旁午未暇一問名勝蹟去歲旱甚祈雨於白龍潭之神幸獲有秋乃築祠於樵雲樓故址以時行禮往來湖上顧流孟浣月諸勝謀復舊觀而費無所出懼其蹟之遂湮也思訪采舊聞傳諸紀載以待後之人因選郡士洪子震煊沈子河斗郭子協寅共爲纂述書未竣適余攝監司事往蒞永嘉復屬郡學博沈君焯使成之茲湖周廣里餘不及西湖二十分之一既不能區分門類姑隨其路之遠近與其址之存圯略加次第輯成卷思仍天台山志之例則藝文之多又數倍於名勝標題錯雜開卷未易了然因倣范石湖吳郡志以地爲綱而採詩古文散附各條之下庶比事屬詞不失古法俾讀者知昔日士大夫觴咏之盛其流風餘韻炳耀桑梓可以有所慕而興起而名區勝概亦得與詞藻同傳不至日就蕪沒未必非修復之見端也是爲序

嘉慶九年歲在
甲子三月上巳

粵西風土記一卷

清洪熙績撰

康熙府志

台南洞林志二卷

清馮賡雪撰原本殘缺葉書重加增輯有聚珍本

自序曰從來
洞天之說出

於道藏洞淵集及雲笈七籤後皆祖之殆言神聖之奧都仙靈所
窟宅也至儒家云藏之名山傳諸其人夫必欲藏而傳之則必有
洞可知如會稽宛委廬山白鹿其書傳人傳而山與洞壑亦與之
俱傳大率人傑而地以靈不然人未遇而地之靈自在也今考道
藏統九州寰宇而論之有十大洞天有三十六洞天黃巖委羽爲
第二洞天天台玉京爲第六洞天仙居凝真爲第十洞天臨海蓋
竹爲十九洞天寰宇其大今以一郡而比九州已得其四爲不多
矣然其名勝尙未盡也且就臨海東南冥摻遐討自蓋竹百餘里
至金龍以至仙岩得洞五曰蘼金曰蓋竹曰潮音曰黃石曰百花
自金龍至雉溪得洞六曰雨華曰金仙曰雙蓮曰碧雲曰瓊華曰

台郡形勝記一卷

清洪瞻陛撰

台州著錄考

崢嶸自武溪十餘里至武坑得洞八曰瑤京曰聯輝曰寶幢曰玉鏡曰玉筍曰明霞曰翠微曰彩琳自武坑十餘里至芙蓉得洞六曰石鼓曰芙蓉曰金星曰蓮花曰青雲曰雙珠自芙蓉三十里至小芝以至澗羅得洞三曰正陽曰初陽曰迎陽共二十有八洞適符天星列宿之數其玲瓏奇巧更非蓋竹所可擬而玉京委羽無論矣第彼早傳乎道藏此盡闕乎烟霞豈若人生顯晦固有數乎抑待其人而後彰乎夫仙岩之百花因文信國寄宿而顯金龍之蘸金得石克齋講學而名乃知洞非能傳人人實能傳洞也僕不敏竊敢研墨濡毫標其靈蹟分爲五路終以山水可游者附焉後之君子循僕履痕按所記關治則今日猿狖之宮即他年絃誦之地也委宛白鹿將盡萃吾邑矣曰台南者以臨海在天台之南洞林云者以洞天叢聚如林也乾隆壬辰題於霞城近聖書院

中興館閣錄十卷續十卷

四庫提要作南宋館閣錄

宋陳騭撰有刻本續錄十卷無撰人名氏

四庫全書總目提要陳氏書錄解題謂淳熙中

駭長蓬山與同僚錄建炎以來事爲此書李燾爲之序續錄者後
人因舊文而增附之今考是錄所載自建炎元年至淳熙四年續
錄所載自淳熙五年至咸淳五年皆分沿革省舍儲藏修纂撰述
故述官秩廩祿職掌九門典故條格悉畢備亦一代文獻之藪
也世所傳本譌闕殆不可讀惟永樂大典所載差爲完具今互相
考訂補其脫漏者三十一條正其舛錯者一十六條而其紀載諸
人爵里有與宋史互異者並爲臚注以資參考惟前錄中沿革一
門續錄中廩祿一門永樂大典所載亦全卷皆佚無從補葺蓋是
書殘缺已在明以前矣今亦姑仍其舊焉李燾序曰館閣錄十
卷淳熙四年秋天台陳騷叔進與其僚所共編集也上世官修其
方故物不坻伏後世勿安厥官其方莫修職業因以放失夫方云
者書也究其本原事迹及朝夕所當思營者悉書之法術具焉使
居是官者奉以周旋雖百世可考爾周官三百六十官各有書小
行人適四方則物爲一書多至五書蓋古之人將有行也舉必及
三惟始衷終依據審諦則其設施斯可傳久彼狡焉滅棄典籍縱
意自如幸六龍駐蹕臨安踰四十年三省樞密院制度尙稽復舊
惟三館秘閣歸然傑出非百司比自唐開元韋述所集記注元祐
間宋宣獻之孫匪躬作館閣錄紹興改元程俱致道作麟臺故事
宋氏皆祖韋氏而程氏故事并國初他則多闕蓋未知其有宋錄
也惜最後四卷俄空焉余屢蒐采弗獲欲補又弗暇每每太息今

所編集第斷自建煇以來凡物巨細靡有脫遺視程氏誠當且密
官修其方行古道者不當如是耶昏忘倦游喜見此書乃援筆爲
序之

書簾緒論一卷

宋胡太初撰

四庫全書總目提要太初天台人端平乙未其外舅
陶某出宰香溪太初因論次居官之道凡十五篇以

貽之後十七年爲淳祐壬子太初出守處州越明年復得是橐於
其戚陶雲翔遂餒諸版以授屬縣其目首曰盡已次曰臨民曰事
上曰寮案曰御史曰聽訟曰治獄曰催科曰理財曰差役曰賑恤
曰行刑曰期限曰勢利而終之以遠嫌條目詳盡區畫分明蓋亦
州縣提綱之類也書中臚列事宜雖多涉宋代條格與後來職制
不盡相合然其大旨以潔己清心愛民勤政爲急務言之似平平
近而反覆推闡實無不切中事情世說新語載傅氏有理縣譜其
書不傳牧民者能得是編之意而變通之則此一卷書亦足補其
闕矣太初自爲序曰析圭分爵從政涖民等爾而於治邑獨憚
焉鑊湯以喻其煎熬償償以狀其不得已之意嘻邑非果不可爲
也或者材與學未之副也外舅通直天材家學見稱於時試邑香
溪游刃無全牛矣將有行也規規問政若無所能者豈非以衆所